

241*

nardo Emo fo li disse: « Ove è i buoi ». Rispose il proveditor Capelo: « Ne ho auto 10, vui averè 4 » e cussì è stà partidi; lui non li volse. Disse a la Rosà soto Bassan dove ha da far, dito sier Polo è pien di animali venuti di campo e altri beni del povero brexan. Disse di certo sajo, di la divisa di sier Alexandro Donado di sier Piero, di zambeloto, qual ha uno suo zovene etc. *Item*, dito proveditor andò a lozar in caxa di uno povero citadin, qual havia 10 bote de vin, e tutte le tolse senza pagarle; poi disse di 37 milia ducati ch'è tra il conte Guido Rangon e Domenego di Malo e Antonio Rosso rasonato fratello di Andrea suo secretario, questi 3 si troverà tra loro di 37 milia ducati, cargando molto esso sier Polo Capello, qual è la ruina dil campo, di pocho governo, pocho amado da le zente d'arme, non ha cuor etc. E non fa per la Signoria nostra a tenerlo in campo; e tuto voleva justificar, quello diceva era la verità. Poi volse intrar su le zente d'arme, ma non fo aldito perchè il proveditor Moro havia dito. Disse che sier Sigismondo di Cavali proveditor suo colega et executor havia fatto assà danni sul veronese, come li disse il governorator, e laudò sier Alvisè Bembo. E replicando più volte contra sier Polo Capello senza un respeto al mondo, vene zoso, et andò a sentar aspetando il Doxe li desse il laudo. E sier Filippo Capello di sier Polo sopradito, qual per danari vien in Pregadi, *licet* zovene sia, andò in renga per justificar suo padre, e il Principe lo fece venir zoso; qual andò da Soa Serenità pregando lo lassase parlar, e la Signoria non volseno, ed il Principe disse che sier Lunardo Emo havia fato una nuova forma di relation e più non aldita, e li dispiaçeva a dir queste cosse, cometendoli ch'el dovesse meter in scrittura e portarle in Colegio, perchè si partiria poi il formento di la paja; e che si se troverà la verità, meritava laude che senza respeto avesse dito in el Senato tal cosse, e quando dito Lunardo Emo lo ringratiò e li tochò la man, disse forte: « Riporterò tuto in nota Serenissimo Principe, et tuto vi proverò che quello ho dito è la verità. » Et cussì a hore 3 di note fo licentiat il Pregadi, et restò Consejo di X con la zonta zercha meza hora da poi. *Unum est* la exposition del Stafileo non fo referita al Pregadi.

È da saper, sier Cristofal Moro laudò molto dito Leonardo Emo di la sua diligentia nel brexan a trovar vituarie, etc.

Di campo, fo lettere da Ronchi, dil proveditor Capello, di 27. Nulla da conto, zercha zente d'arme et pagamenti, e non fo lecte.

A di 29, *etiam* fo gran pioza. Non fo alcuna lettera in Colegio, et fo ordinato Pregadi, *licet* i Cai di X volesseno il suo Consejo; ma sier Zacaria Dolfin savio dil Consejo volse il Pregadi per proveder a la dispensation del danaro in campo; *etiam* li altri savii che compieno, per meter le loro parte.

Da poi disnar fo Pregadi, e non fo leto alcuna letera.

Fu posto, per li consieri e savii, che hessendo stà electo sier Aurelio Michiel proveditor a Martinengo, qual non li è stà limità salario per spexe, che el sia a la condition di altri, *videlicet* l'habi ducati al mexe per spexe e stagi uno anno; e fu presa.

Fu posto, per li savii, hessendo stà fato nel nostro Mazor Consejo tre volte eletion di luogotenente in la Patria di Friul e non havendo passà niuno, che 'l sia electo per questa volta per scurtinio et 4 man di election per uno anno con ducati 37 $\frac{1}{2}$ al mexe neti, come haveano li altri luogotenenti *ut in parte*, e fu presa; la qual si ha a meter a Gran Consejo.

Fo posto, per li diti, havendo compito sier Francesco Falier podestà et capitano a Vicenza il suo rezimento, che 'l sia electo per Gran Consejo per scurtinio et 4 man di eletion in suo locho podestà et capitano per questa volta *tantum* per uno anno, con ducati 50 netti al mexe per spexe, come fo electo dito sier Francesco Falier; et fu preso, la qual parte si ha da meter a Gran Consejo. 242

Fu posto, per li savii da terra ferma, che a uno Francesco Rossina, qual per soi meriti a Padoa al tempo di la rebelion e di l'assedio *ut in parte*, li sia dato la expetation dil capitano di le prexon di Padoa, da poi la morte di questo è al presente. Ave di sì et di no e fu presa; e fo contra la forma di la parte che non vol si dagi officii per expetativa, *tamen* li avogadori la lassono passar.

Fu posto, per li savii da terra ferma, certa confirmation a uno Lucha di Pasqual da Cataro, di ducati 4 di provision havea suo padre al mexe, che l'habi suo fiol *ut in parte*, e fu presa.

Fu posto per li diti, che sier Andrea Contarini governador a la Cefalonia, qual ha concesso certo officio in li *ut in parte* a Zuan Ardavani in loco di Zorzi Vatazi morto li a Cefalonia, ch'el sia confirmato *ut in parte*, e fu presa.

Fu posto, per sier Zacaria Dolfin savio dil Consejo solo, che de presente sia electo uno proveditor zeneral apresso sier Polo Capello el cavalier, el qual habi cura dil danaro, e sia presente a la dispen-